

周華斌：櫻花之戀--寫予恭子

無可能放 bē 記

因為妳上恰意的さくら (SAKURA)

逐冬擺會開花

咱少年時代的故事

嘛會先佇心肝底熘過

一擺閣一擺

酸澀甘甜

尤其故事的頭尾二段.....

一、頭段：渡鳥

——走揣春天

以走揣春天的能力來講

阮猶是一隻幼芷的渡鳥

佇猶未揣著以前

Kan-na 會使

一片欣羨前輩破讀春天的模樣

一片家己用夢想來予心肝頭溫暖

久年來

根據濟濟的資料

佇心內湊出理想的春天情景

佇頭殼內畫出適合家己的地圖

以動物的本能拍拚走揣傳說中的春天

一直擺揣無.....

無定春天只是

虛幻的神話？

無定阮無法度脫離

流浪的運命？

到 ta°猶揣無.....

無定毋是無拄著春天？

只是毋敢飛入未知的所在

顛倒趕緊 iāt 翼股

逃走

甘願 kã 家己封鎖佇熟似的冬天？

佇孤單的深夜
振開心肝內的記錄
雄雄發現
逐擺溫柔的妳若行來
心肝內道隨感覺一陣一陣的溫暖
Kám 講 he 道是傳說中的春天？

二、尾段：永遠的心事
——思念恭子

猶未完成的千羽鶴
已經未赴予妳.....
紙鶴的表情
為啥物會 tsiah 稀微？

吊佇かばん的御守り
變成懷念妳的物件.....
若會使保庇平安
妳應該留佇身軀邊才著！

毋承認批殼頂面的退回印記
是永別的宣判.....
一再退回的批信
Kám 毋是妳對阮的戲弄？

妳送的鎖匙鑰（khian）仔
永遠鑰佇阮心肝底.....
鎖匙鑰仔頂面結的是
對妳一個閣一個的思念！

さくら開花的所在
有妳的笑聲留佇 hia
配合春風吹動花蕊
佇阮心內響起叮叮咚咚的聲.....

逐冬佇さくらの花期進前
心事攏會著急開代先

佇花期過去了後
煞閣毋甘花謝.....